

ԱՐԵՒՄՈՒՏՔ

Գրեց՝ ԿՈՍՏԱՆ ԶԱՐԵԱՆ

ՏԱԳՆԱՊ

Աշունը ապակի է դեղին բոժոժներ էր շար-
ժում :

Պատուհանիս երկայն վարագոյրի վրայ
մի կտոր լոյս էր թառել . ներսը չեղակի շու-
քեր : Դրսում ման եկող հարբած քամին կար-
ծես ամէն ինչ շարժում էր : Դուռը բացւում էր
եւ աղմուկով գոցւում . ապակի է լամբարը տա-
տանւում էր . պատուհանը դողում էր :

Հին վենետիկեան տունները լեցուն են խոր-
հըրդաւոր ներկայութիւններով : Իւրաքանչիւր
սենեակ իր պատմութիւնն ունի . իւրաքանչիւր
մի անկիւն սառած լուսթիւնների հետ է խօ-
սում :

Վերմակի տակ պառկել էի , դեղնած չըր-
թունքներով եւ այրուող ճակատով՝ ես եւս
հինաւորաց մի յիշատակ : Դարերի մէջ ստեղ-
ծւած պատմութիւնների ծոցին միտքս փալ էր
բաց անում , անհանգիստ ձեռքերով շարում էի
խաղաթուղթերը , վիճակ էի դուրս հանում ,
պրպտում խաւարը եւ յետոյ՝ գլուխս ուժաս-
պառ վայր էի նետում բարձի վրայ եւ աչքերս
յառում ձեղունին , ուր միամիտ թռչուններ է-
ին նկարուած :

Ամէն ոք գիտէ , որ այն տարին աշունը ի-
ջել էր պատուած թեւերով եւ խիստ բարկա-
ցած : Հիւսիսային բեւեռից մինչեւ Գրոեն-
լանդ՝ ցրտի ալդ շտեմարանը՝ քամին սուրա-
ցել էր կատաղի , ամպի կտորներ բերանին մէջ
սեղմած . պտոյտ էր եկել Անգլիոյ վրայ , ե-
ղունգները քսել Լամանչի ջուրերին , յետոյ
վեր էր բարձրացել , նետուել Բելգիայի ծխնե-
լոյզների վրայ , աւելել դաշտեր , տանիքներ
փչրել ու Ծրանսայի վրայից ոռնալով , Ալպեան
լեռների մօտ մեղմացած , եկել ընկել էր Լա-
զունա : Լիզիոյի մօտ մակոյկներ էին խորտակ-
ուել . ձկնորսների առաքաստանները՝ աքլորի

գոյն՝ շուտափոյթ վերադարձել էին տուն :
Նաւամատոյց շոգենաւերը ուշացրել էին իրենց
մեկնումը :

Հիմա անշուշտ ման էր դալիս Կալէնքի
մէջ՝ մազերը վեր տնկած եւ թեւերը թափա-
հարելով : Սուրբ Մարկոսի վրայից թառամած
տերեւների նման ոսկիներ էին թափած . Կա-
դօրը ծփում էր փուլ եկած ալիքի պէս . Մեծ
Կանալը ջղայնացել էր եւ Աֆրարիի զանգա-
կատան կատարին մի ամպ արիւնել էր իր
կուրծքը :

Ամէն անգամ որ դուռը բացւում էր , սպա-
սում էի որ մէկը ներս կը մտնի :

Ոչ ոք չէր գալիս :

Դուռը բոյնից վայր ընկած թռչունի ձայն
էր հանում : Պատերի վրայ գոյները մարուել
էին : Անկիւնում դրուած փայտէ մեծ սնտուկը
ծանր էր եւ տխուր : Մահճակալիս վրայ հաստ
կտաններ էին կախուած , անհետացած դարձե-
րով : Ձեղունը ցած էր եւ մզլոտութեան հոտ
էր գալիս :

Փողոցից , ուր տները մէկը միւսին չիլ աչ-
քով են նայում , երբեմն ձայներ էին բարձրա-
ցնւում : Անցնող աղջիկների հրհռոց , բանջա-
րեղէն ծախողի մեղմազմոտ եւ արեւելեան
կանչը , երեխաների աղմուկը : Յետոյ , կար-
ծես ամէն ինչ լռում էր . պատուհանը դնացք
էր նստում ու դողդողում , դուռը շարունա-
կում էր խիւլ :

Ականջներս մէջ՝ ջերմի եւ քինինի պատ-
ճառով բարակ մի սուլոց էր լսում , ճակա-
տիս վրայ ձեռքս բոց էր սեղմում , թեւերս
ծանր էին եւ միտքս վառ :

Ոչ ոք չէր գալիս :

Հիւանդութեան կամ բարոյական մեծ
տագնապի ժամանակ , հոգին իր միջից դուրս
հանած վտանգը դնում է իր առջեւ եւ երկա-
րօրէն դիտում :